



N 04/75
23.01.2026

ბრძანება

75-01-4-202601231419



საქართველოს კონკურენციისა და მომხმარებლის დაცვის სააგენტოსთვის მოთხოვნილი
ინფორმაციის მიუწოდებლობაზე შპს „სითიქომ ვესტისთვის“ (ს/ნ: 405350971)
ჯარიმის დაკისრების შესახებ

1. ფაქტობრივი გარემოებები

- 1.1 საქართველოს კონკურენციისა და მომხმარებლის დაცვის სააგენტოს თავმჯდომარის 2025 წლის 10 ნოემბრის N04/1320 ბრძანების შესაბამისად სააგენტოში მიმდინარეობს საქმის მოკვლევა „კონკურენციის შესახებ“ საქართველოს კანონის 11³ მუხლის სავარაუდო დარღვევასთან დაკავშირებით.
- 1.2 აღნიშნული საქმის მოკვლევის ფარგლებში, საქმისათვის მნიშვნელოვანი გარემოებების დადგენის მიზნით ეკონომიკურ აგენტებთან გაიგზავნა წერილები.
- 1.3 2025 წლის 18 ნოემბერს სააგენტომ შპს „სითიქომ ვესტს“ (ს/ნ: 405350971) შესაბამისი ელფოსტის მისამართზე გაუგზავნა წერილი (თარიღი: 18.11.2025; რეგ: N02/5790) საქმისათვის არსებითი მნიშვნელობის მქონე ინფორმაციის გამოთხოვის შესახებ.
- 1.4 იმის გათვალისწინებით, რომ აღნიშნულ წერილზე სააგენტოს მიერ არ იქნა მიღებული ჩაბარების დასტური, მხარისათვის კორესპონდენციის დროულად ჩაბარების უზრუნველსაყოფად, სააგენტოს N02/5790 წერილი გაიგზავნა სსიპ შემოსავლების სამსახურში, გზავნილის გადასახადის გადამხდელის ავტორიზებული მომხმარებლის გვერდზე (www.rs.ge-ზე) ატვირთვის მიზნით. 2025 წლის 15 დეკემბერს სააგენტომ სსიპ შემოსავლების სამსახურისგან მიიღო შეტყობინება, შპს „სითიქომ ვესტი“ აღნიშნულ წერილს გაეცნო 2025 წლის 12 დეკემბერს.
- 1.5 გამოთხოვილი ინფორმაციის წარმოდგენის ვადად კომპანიას განესაზღვრა 5 (ხუთი) სამუშაო დღე, რომლის ათვლაც დაიწყო წერილის გაცნობის (rs.ge-ზე გახსნის) დადასტურების მომდევნო სამუშაო დღიდან და ამოიწურა 2025 წლის 19 დეკემბერს. კომპანიას სააგენტოს მიერ განსაზღვრულ აღნიშნულ ვადაში არ წარმოდგენია გამოთხოვილი ინფორმაცია.
- 1.6 2025 წლის 29 დეკემბერს სააგენტომ იმავე ინფორმაციის გამოთხოვის შესახებ ხელმეორედ გაუგზავნა წერილი (თარიღი: 29.12.2025, რეგ. N02/6585) შპს „სითიქომ

ვესტს“ ელფოსტის მისამართზე. წერილი, ასევე, აიტვირთა გადასახადის გადამხდელის ავტორიზებული მომხმარებლის გვერდზე (www.rs.ge-ზე).

- 1.7 2025 წლის 31 დეკემბერს სააგენტომ სსიპ შემოსავლების სამსახურისგან მიიღო შეტყობინება, შპს „სითიქომ ვესტი“ N02/6585 წერილს გაეცნო 2025 წლის 30 დეკემბერს.
- 1.8 გამოთხოვილი ინფორმაციის წარმოდგენის ვადად კომპანიას განესაზღვრა 5 (ხუთი) სამუშაო დღე, რომლის ათვლაც დაიწყო წერილის გაცნობის (rs.ge-ზე გახსნის) დადასტურების მომდევნო სამუშაო დღიდან და ამოიწურა 2026 წლის 13 იანვარს. კომპანიას სააგენტოს მიერ განსაზღვრულ აღნიშნულ ვადაში არ წარმოდგენია გამოთხოვილი ინფორმაცია.
- 1.9 სააგენტოს კანცელარიამ დაადასტურა, რომ 2026 წლის 16 იანვრის ჩათვლით პერიოდში, კომპანია შპს „სითიქომ ვესტს“ (ს/ნ: 405350971) სააგენტოში საპასუხო კორესპონდენცია არ შემოუტანია არც ელფოსტის, არც ფოსტის და არც ნებისმიერი სხვა საშუალებით.

2. ნორმატიული რეგულირება

- 2.1 „კონკურენციის შესახებ“ საქართველოს კანონის მე-18 მუხლის 1-ელი პუნქტის „ბ“ ქვეპუნქტის თანახმად, სააგენტო უფლებამოსილია, ეკონომიკურ აგენტს/მხარეს/დაინტერესებულ მხარეს მოსთხოვოს მისი საქმიანობის ან/და კონკრეტული ოპერაციის შესახებ ნებისმიერი ინფორმაციის/დოკუმენტაციის (მათ შორის, კონფიდენციალური ინფორმაციის) წარდგენა, რომელიც საჭიროა სააგენტოს მიერ შესაბამისი უფლებამოსილების განხორციელებისთვის.
- 2.2 „კონკურენციის შესახებ“ საქართველოს კანონის მე-18 მუხლის 1-ელი პუნქტის „ვ“ ქვეპუნქტის თანახმად, სააგენტო ეკონომიკურ აგენტთან მიმართებით უფლებამოსილია მოთხოვნილი ინფორმაციის განსაზღვრულ ვადაში მიუწოდებლობის შემთხვევაში ეკონომიკურ აგენტს/მხარეს/დაინტერესებულ მხარეს დააკისროს ჯარიმა ამ კანონის 32-ე მუხლის შესაბამისად.
- 2.3 „საქმის მოკვლევის წესისა და პროცედურის დამტკიცების თაობაზე“ კონკურენციის სააგენტოს თავმჯდომარის 2020 წლის 28 ოქტომბრის N40 ბრძანებით დამტკიცებული წესის მე-8 მუხლის 1-ელი პუნქტის მიხედვით, სააგენტო უფლებამოსილია ეკონომიკურ აგენტს/მხარეს/დაინტერესებულ მხარეს მოსთხოვოს ნებისმიერი დოკუმენტი/ინფორმაცია (მათ შორის, კონფიდენციალური), რომელიც საჭიროა სააგენტოს მიერ შესაბამისი უფლებამოსილების განხორციელების პროცესში და ხელს შეუწყობს საქმისათვის მნიშვნელოვანი გარემოებების დადგენას.
- 2.4 „საქმის მოკვლევის წესისა და პროცედურის დამტკიცების თაობაზე“ კონკურენციის სააგენტოს თავმჯდომარის 2020 წლის 28 ოქტომბრის N40 ბრძანებით დამტკიცებული წესის მე-11 მუხლის 1-ელი პუნქტის მიხედვით, სააგენტოს მიერ მოთხოვნილი

ინფორმაციის დადგენილ ვადაში მიუწოდებლობა, არასწორი ან არასრული ინფორმაციის მიწოდება გამოიწვევს იურიდიული პირის დაჯარიმებას სამი ათასი ლარის ოდენობით, ხოლო ფიზიკური პირის დაჯარიმებას – ათასი ლარის ოდენობით. ამავე წესის მე-10 მუხლის მე-2 პუნქტის თანახმად კი ინფორმაციის მიუწოდებლობად არ ითვლება სააგენტოს მიერ განსაზღვრულ ვადაში დასაბუთებული პასუხი მოთხოვნილი ინფორმაციის არქონის შესახებ.

2.5 „კონკურენციის შესახებ“ საქართველოს კანონის 32-ე მუხლის 1-ელი პუნქტის, „საქმის მოკვლევის წესისა და პროცედურის დამტკიცების თაობაზე“ კონკურენციის სააგენტოს თავმჯდომარის 2020 წლის 28 ოქტომბრის N40 ბრძანებით დამტკიცებული წესის მე-11 მუხლის 1-ელი პუნქტის თანახმად, სააგენტოს მიერ მოთხოვნილი ინფორმაციის მისთვის მის მიერვე განსაზღვრულ ვადაში მიუწოდებლობის ან სააგენტოსთვის არასწორი ან არასრული ინფორმაციის მიწოდების შემთხვევაში იურიდიულ პირს დაეკისრება ჯარიმა 3 000 ლარის ოდენობით, ხოლო ფიზიკურ პირს – 1 000 ლარის ოდენობით.

2.6 „კონკურენციის შესახებ“ საქართველოს კანონის 32-ე მუხლის მე-3 პუნქტის მიხედვით, ჯარიმის დაკისრება პირს არ ათავისუფლებს სააგენტოსთვის ინფორმაციის მიწოდების ვალდებულებისგან.

3. სამოტივაციო ნაწილი

3.1 შპს „სითიქომ ვესტს“ (ს/ნ: 405350971) 2025 წლის 18 ნოემბრის (N02/5790) და 29 დეკემბრის (N02/6585) წერილების პასუხად არ წარმოდგენია არავითარი ინფორმაცია/დოკუმენტაცია, არ მოუთხოვა ინფორმაციის წარმოდგენის ვადის გაგრძელება და არ შეუტყობინებია სააგენტოსთვის ინფორმაციის მოუწოდებლობის რაიმე შესაძლო საპატიო მიზეზის/მიზეზების არსებობის თაობაზე.

3.2 სააგენტო აღნიშნავს, რომ ინფორმაცია გამოთხოვილია „საქმის მოკვლევის წესისა და პროცედურის დამტკიცების თაობაზე“ კონკურენციის სააგენტოს თავმჯდომარის 2020 წლის 28 ოქტომბრის N40 ბრძანებით დამტკიცებული წესის მე-8 მუხლის 1-ელი პუნქტის საფუძველზე, რომლის თანახმადაც სააგენტო უფლებამოსილია ეკონომიკური აგენტს/მხარეს/დაინტერესებულ მხარეს მოსთხოვოს ნებისმიერი დოკუმენტი/ინფორმაცია (მათ შორის, კონფიდენციალური), რომელიც საჭიროა სააგენტოს მიერ შესაბამისი უფლებამოსილების განხორციელების პროცესში და ხელს შეუწყობს საქმისათვის მნიშვნელოვანი გარემოებების დადგენას. აღსანიშნავია, რომ სააგენტოს 2025 წლის 18 ნოემბრის (N02/5790) და 29 დეკემბრის (N02/6585) წერილებში მითითებულია ყველა ის მონაცემი, რომელთა მითითებაც მოთხოვნილია „საქმის მოკვლევის წესისა და პროცედურის დამტკიცების თაობაზე“ კონკურენციის სააგენტოს თავმჯდომარის 2020 წლის 28 ოქტომბრის N40 ბრძანებით დამტკიცებული წესის მე-8 მუხლის მეორე პუნქტის საფუძველზე.

3.3 შპს „სითიქომ ვესტი“ (ს/ნ: 405350971) ვალდებული იყო წარმოედგინა სააგენტოსთვის საქმის მოკვლევის ფარგლებში მნიშვნელოვანი გარემოებების დადგენა/დაზუსტებისათვის საჭირო და სააგენტოს შესაბამისი წერილებით მოთხოვნილი ინფორმაცია.

3.4 სახეზე არ არის „საქმის მოკვლევის წესისა და პროცედურის დამტკიცების თაობაზე“ კონკურენციის სააგენტოს თავმჯდომარის 2020 წლის 28 ოქტომბრის N40 ბრძანებით დამტკიცებული წესის მე-11 მუხლის მე-2 პუნქტით გათვალისწინებული მხარის დასაბუთებული განცხადება, მოთხოვნილი დოკუმენტის/ინფორმაციის არქონის შესახებ.

3.5 ყოველივე ზემოთ აღნიშნულიდან გამომდინარე, „კონკურენციის შესახებ“ საქართველოს კანონის 32-ე მუხლის 1-ელი პუნქტის, აგრეთვე, „საქმის მოკვლევის წესისა და პროცედურის დამტკიცების თაობაზე“ კონკურენციის სააგენტოს თავმჯდომარის 2020 წლის 28 ოქტომბრის N40 ბრძანებით დამტკიცებული წესის მე-11 მუხლის 1-ელი პუნქტის თანახმად, სააგენტოს მიერ მოთხოვნილი ინფორმაციის მისთვის მის მიერვე განსაზღვრულ ვადაში მიუწოდებლობის შემთხვევაში, იურიდიულ პირს დაეკისრება ჯარიმა 3 000 ლარის ოდენობით.

სარეზოლუციო ნაწილი

„კონკურენციის შესახებ“ საქართველოს კანონის მე-17¹ მუხლის მე-4 პუნქტის, 32-ე მუხლის 1-ელი პუნქტისა და „საჯარო სამართლის იურიდიული პირის - კონკურენციის სააგენტოს დებულების დამტკიცების შესახებ“ საქართველოს მთავრობის 2014 წლის 14 აპრილის №288 დადგენილებით დამტკიცებული დებულების მე-4 მუხლის მე-4 პუნქტის „ე“ ქვეპუნქტის შესაბამისად,

სააგენტომ დაადგინა:

1. დადასტურდეს შპს „სითიქომ ვესტის“ (ს/ნ: 405350971) მხრიდან სააგენტოს მიერ გამოთხოვილი ინფორმაციის/დოკუმენტაციის წარმოდგენლობის ფაქტი.
2. „კონკურენციის შესახებ“ საქართველოს კანონის 32-ე მუხლის 1-ელი პუნქტის შესაბამისად, შპს „სითიქომ ვესტის“ (ს/ნ: 405350971) დაეკისროს ჯარიმა 3 000 (სამი ათასი) ლარის ოდენობით.
3. კომპანია შპს „სითიქომ ვესტის“ (ს/ნ: 405350971) დაევალოს საქართველოს კონკურენციისა და მომხმარებლის დაცვის სააგენტოს მიერ 2025 წლის 18 ნოემბრის (N02/5790) და 29 დეკემბრის (N02/6585) წერილებით მოთხოვნილი ინფორმაციის 10 (ათი) სამუშაო დღის ვადაში წარმოდგენა.

4. ბრძანება მისი მიღებისთანავე გადაეგზავნოს კომპანია შპს „სითიქომ ვესტს“ (ს/ნ: 405350971).
5. ბრძანება მისი ხელმოწერიდან 10 (ათი) სამუშაო დღის ვადაში გამოქვეყნდეს სააგენტოს ოფიციალურ ვებგვერდზე.
6. ბრძანების გასაჩივრება შესაძლებელია საქართველოს კანონმდებლობით დადგენილი წესით წინამდებარე აქტის ოფიციალური წესით გაცნობიდან ერთი თვის ვადაში თბილისის საქალაქო სასამართლოში (მის: ქ. თბილისი, დავით აღმაშენებლის ხეივანი №64).
7. ბრძანება ძალაში შევიდეს ხელმოწერის დღიდან.

ირაკლი ლექვიჩიძე

თავმჯდომარე

